



Quotidiana Christiani Militis Tessera

Stanyhurst, Guillaume

Coloniæ Agrippinæ, 1682

25. Dies Martii. Verbum caro factum est. Ioan. 1.

Nutzungsbedingungen

[urn:nbn:de:hbz:466:1-55659](https://nbn-resolving.org/urn:nbn:de:hbz:466:1-55659)

apud te, & juxta te, cum sit extra te, non est tuum. Si talia sint mundi bona, adeoque familiaris eorum fugacitas, quid ad illam veluti insolitam stupidi stupeamus? quidve exoptulandum, si juxta naturæ suæ conditionem, simul & influant, & effluant? nec apud aliquem sint perpetua, sed pertæsa diuturnioris apud eum moræ, alias sedes quæsi verint, eadem infidelitate, alio migratura, & nusquam stabiliter hæsuræ, donec prorsus in nihilum abeant? Hoc fuit hæctenus feretrum, quod nunc unum tenuit, nunc excussit, rursusque hoc dimisso, succedentem accipiet, brevi rejecturum. Spretis igitur omnibus hæctenus conglobatis, & recensitis bonis, aliud investigandum, cui adhæreas, illis enim nunquam acquiesces, quia id indubitarum?

De re terrenâ, nihil est aliud, nisi pœna.

25. DIES MARTII.

Verbum caro factum est. *Ioan. 1.*

Unum bonum, Verbum Incarnatum.

ECCE hîc Verbum omnium verborum, quæ ab ore Divino proferri, quæ à corde humano fingi possunt, antiquitate primum, dignitate summum, ante omnia sæcula à Patre dictum, post quadraginta, & amplius sæcula à Matre factum: quod concepit humilitas; peperit virginitas, æternum infiniti temporis Verbum, Quem posthæc terreat Divinus homo, quem non alliciat humanus Deus? O Anima! eras prius Marthæ exem.

exemplo sollicita circa plurima, ut reperires bonum; quo invento desineres esse malus; quo possessio inciperes esse bonus. Ecce hic bonum unum, simul & summum, ex quo, in quo, per quod bona omnia, in utero Virginis simul & Matris. Si quæras nomen ejus, quod est admirabile, accipe illud ex ore cœlestis Oratoris, quia est homini ineffabile: (a) *Vocabitur nomen ejus Jesus.* Hoc est nomen olim decretum in arcanis Augustissimæ Triados comitiis, ante omne tempus. Ex solo Nomine proclivè erit intelligere, quis, & quantus sit ille, cujus tantum est Nomen, ut vel illud intelligenti sit Numen.

II. Quid est Jesus? si respicis, est sine principio Æternitas: si prospicis, est sine termino Immortalitas: si suspicis, est supra omne culmen Sublimitas: si despicias, est sine fundo Profunditas: si circumspicis, est sine mensura Immensitas. Quid est Jesus? cui servire, est utilitas; subesse, Dignitas; amare, sanctitas; timere, securitas; osculari, castitas; audire, Scientia; intelligere, Sapiencia; obtemperare, Prudentia; sequi, Gloria; assequi, felicitas; videre, videntis ultima Beatitas. Quid est Jesus? si vis adorare, est Majestas: si diligere, est Bonitas. Si sperare, est Misericordia. Si timere, est Justitia. Si admirari, est Sapiencia. Si operari, est Potentia. Si gaudere, est lætitia. Si salvari, est bonorum omnium copia. Quid est Jesus? si cæcus es, est Lux. Si infirmus, est Medicina. Si nudus, est Vestis. Si ignorans, est Doctrina. Si pauper, est Opulentia. Si inanis, est Plenitudo. Si pusillus, est Magnitudo. Si angustus, est Latitudo. Si debilis, est Fortitudo. Quid est Jesus? est sitienti

P

fons:

(a) *Luc. 2.*

fons ; esurienti panis ; marenti solatium ; laboranti præmium ; currenti bravium ; naviganti portus ; peregrinanti patria ; pugnanti corona ; erranti Via ; credenti Veritas ; morienti vita ; pereunti salus. Quid est Jesus ? Est prodigium Naturæ , miraculum Gratiæ , opus omni ex parte absolutissimum ; in quo elaborando singulæ Dei perfectiones , se totas conatu toto impenderunt. Quo nihil Sapientia mirabilius , nihil Bonitas melius , nihil Majestas augustius , nihil ipsa Dei charitas ad amorem potentius potuit effingere. Nihil addam amplius , quia quidquid de illo dixerim , perinde est , ac si siluerim.

III. Cùm igitur , talis , ac tantus est Jesus , qualem ac quantum jam legisti , sed nunquam fatis intelliges ; potesne melius , & utilius impendere , & superimpendere omnes & ingenii nervos , & industria vires , & Animi facultates , & corporis membra , quàm in colendo , & amando eum , à quo ut posses amare , accepisti facultatem , Jesum ? Omnia quæ sunt à Deo condita , si possent humana voce resonare ; quid aliud monerent , urgerent , clamarent , quàm ut ametur Jesus ? Non hoc fugiebat Augustinum , hinc illa ejus verba : *Cælum , & terra , & omnia quæ in eis sunt , ecce undique mihi dicunt , ut Te amem , nec cessant dicere omnibus , ut sint inexcusabiles.* Et quomodo ego , pro quo Verbum factus est , Caro , excusabor ? imo quomodo ego à cælo , & terra non accusabor , si vivens in terris , te non amem super omnia ; per quem propter me facta sunt omnia ? Tanto plus Tibi debeo , quàm meipsum : quanto tu Jesu major es meipso , qui pro me Incarnatus dedisti teipsum ; & toties dedisti nascendo , vivendo , moriendo , resurgendo

Martius.

Tessera.

227

gendo, & corpore toto me alendo. Pro beneficio tuo quod mihi dare potes minimo, ut tibi dignas agam gratias, non sufficit tota æternitas: quid faciam, ut satisfaciam pro beneficio, cujus magnitudo est infinita, amplitudo immensa? fac saltem, ut totum, quod tuum est creatione, & restauras Incarnatione, faciam ego totum tuum amore. Te enim solùm intelligere, & diligere sufficit ad salutem. Sic pia modulante avenâ Poëta.

Si Jesum discis, satis est, si cetera nescis:

Si Jesum nescis, nihil est, si cetera discis.

26. DIES MARTII.

Quid est bonum? rerum scientia. Quid malum? rerum imperitia. *Seneca ep. 31.*

Boni natu- I.
ra investi-
gatur.

Bona Naturæ, & fortunæ, quæ non sunt hominis, quia extra hominem, bona esse larvata, bracteata, personata, sive admodum nulla, adeoque è catalogo Bonorum expungenda, non digito leviter ostendimus, sed rationibus solide convicimus. Quod porro tam perniciosè hallucinemur in discrimine bonorum, & malorum, causa est, quam innuit hodierna tessera, Bonorum, & Malorum ignorantia. Hinc malorum tanta multitudo, bonorum tanta solitudo. Vertex itaque Christianæ philosophiæ, est illa scientia nostri Messia, scire, reprobare Malum, & eligere Bonum. O Bonum à paucis benè intellectum, quia à mult